

成安縣志

卷十一上

成安縣志卷十一

人物

漢書人物表魏劉邵人物志皆所以分別流品標揚賢達非以此爲一代之主體也邑乘不然邑之有人物猶動物之有髓植物之有仁礦物之有原素一邑之所賴以成終成始也古人云不有君子其何能國又曰十室之邑必有忠信蓋主宰是綱維是者無世無之焉吾成自玄黃初闢仁人君子聖賢豪傑及忠義節烈智能之士所在多有而與時俱進史冊載者無幾若不表而出之其學問功業道德文章暨幼時嬉游故事將日就湮沒與草木同腐而土地爲枯殼政治亦淪於無機體邑則不成

爲邑矣茲擇其可傳者傳焉使後之人知維持社會啟迪人心  
以至永永不朽者其中固大有人在也志人物

一二戴附憑胄至德

戴德字延君號大戴爲漢信都太傅姪聖字次君號小戴以博  
士論石渠至九江太守皆註禮記由是禮有大戴小戴之學

漢書

儒林傳 德裔孫景珍胄至德聖孫月憑

按戴氏出自子姓宋戴公之孫以祖父諡爲氏傳至德世居

魏郡斥丘

新唐書宰相世系表

漢初高堂生傳禮於蕭奮奮傳之孟卿卿

傳之后蒼后蒼傳之德爲大戴禮記後授經於瑯邪徐良遂

成徐氏之學聖與德齊名亦師事后蒼得其學著小戴禮記

授經於橋仁楊榮仁爲大鴻臚榮爲瑯邪太守遂有橋楊之  
學德裔孫景珍爲北魏司州從事其仲孫胄字玄胤相唐太  
宗胄兄子至德相高宗聖孫月作中山人物志生憑爲光武  
侍中僑寓汝南後世曰寬者同弟聚仍返斥丘鄉義村居焉

舊縣志

憑字次仲寄居汝南家世禮記尤習京氏易年十六舉明經拜  
郎中光武詔公卿大會羣臣皆就席憑獨立問其意對曰博士  
說經皆不如臣而坐居臣上是以不就帝詔上殿與諸儒難說  
多所解釋帝善之拜爲侍中數進見帝曰侍中當匡輔國政勿  
隱遂救蔣遵時遵禁錮帝疑其黨憑自繫廷尉言終不屈帝兩



釋之詳見故正旦朝賀帝令不能說經者奪席憑重坐五十席京

師語曰解經不窮戴侍中在職十八年卒於官後漢書列傳

胄字玄胤寄居相州隋末爲王世充守武牢太宗拔之引爲府士曹參軍時大理少卿缺太宗曰大理人命所繫胄清直其人哉卽日命胄胄犯顏據正數查參處法意至析秋毫帝益重之遷尙書左丞旋拜諫議大夫進民部尙書檢校吏部尙書貞觀四年以本官參預朝政卒贈尙書右僕射無子以兄子至德爲

後新唐書列傳

至德乾封中累遷西臺侍郎同東西臺三品高祖嘗爲飛白書賜至德曰汎洪源俟舟楫遷尙書右僕射儀鳳四年卒贈開府

儀同三司并州大都督

新唐書列傳

按前漢書傳二戴曰梁人後漢書傳憑曰汝南平輿人新唐書傳胄曰相州安陽人廣平府志因之遂削去舊縣志戴氏世譜置新唐書宰相世系表於不顧婉其詞曰俟再考不知憑於汝南胄於相州皆一時僑居之地而原籍固仍在斥丘也且當秦漢之際斥丘屬魏魏之首都曰梁一時士大夫表里居者往往以梁冠魏史記魏惠王三十一年徙治大梁孟子謂之梁惠王朱註曰梁惠王魏侯瑩也斥丘以魏地曰梁猶今之成安屬廣平府言廣平卽包括成安在內也本志故仍錄二戴而辨於此

又邑之鄉義村尙有漢大儒大小戴碑一石而字跡尙存村

西北又有二戴冢前之神道痕跡數十丈若斷若續埋於土中相傳冢已沒於潭水獨留此殘缺不完之神道於夕陽蔓草間邑之人過而指目之曰此戴氏冢也此亦大小二戴係本邑人之一證也

采訪  
冊

### 黃泓

黃泓字始長斥丘人精天文術尤明易禮晉永嘉之亂率宗族歸慕容廆廆待以客禮引爲參軍軍國之務皆諮之公談成敗事皆如言廆常曰黃參軍孤之仲翔也及慕容儁稱帝爲進謀將軍常從左右諮決大事年九十七卒

晉書  
列傳

### 慕容儼

慕容儼字恃德清都成安人慕容廆之後也容貌出群學兵法工騎射正光中魏河間王元琛率衆救壽春辟儼左廂軍主屢立戰功孝昌中爾朱榮授儼京畿南面都督北育太守宋帶劍謀叛儼出其不意執之一郡遂定又累有功除強弩將軍轉積射將軍爾朱敗歸北齊高祖以勳累遷安東將軍東雍州刺史西魏郭鸞來攻以拒守功進號鎮南將軍又屢有戰功天保初除開府儀同三司時清河王岳帥師江上遣儼鎮郢城始入梁大都督侯瑱任約率水陸軍奄至城下儼隨方禦備間率步騎出城奮擊大破之又與將士力戰斬瑱驍將張白石後城中食少糧運阻絕儼猶申令將士死生以之歷數月人無異志後蕭

方智請和帝詔還儼望帝悲不自勝帝呼令至前執其手曰觀卿容貌朕不復相識自古忠烈豈能過此儼對曰臣恃陛下威靈得申愚節重奉聖顏今雖死無恨帝嗟稱不已進伯爲公卒

贈司徒尙書令

北齊書  
列傳

王明

附廣淵臨

王明字如晦成安人後周末歷清平鄆城鄆陵三縣各有政績

舊縣志

宋初知榮州以清白有吏幹召爲左拾遺開寶三年南征

爲隨軍轉運使以計下賀州又與潘美等謀平廣州擢授秘書少監爲嶺南轉運副使明歷部內視民疾苦凡無名科歛悉條奏除之七年將用師南唐以明爲黃州刺史旋以爲池州至岳

州江路巡檢戰擢都部署明襲南唐將朱令贇破擒之金陵平  
召爲右諫議大夫判三司事卒年七十三所著有家集子挺扶  
揆皆知名揆至殿中丞

宋史  
列傳

孫師顏爲三班借職崇祀鄉賢曾

孫廣淵

舊縣志

廣淵字才叔明曾孫慶歷中上明家集詔官其後乃推與弟廣  
廉而以進士爲大理法直官編排中書文字裁定祖宗御史十  
卷仁宗嘉之神宗時知齊州以方春農事興而民苦乏兼併之  
家得以乘急要利乞留本道錢帛五十萬貸之貧民歲可獲息  
二十五萬王安石以爲可用召至京呂公著等撫其舊事劾還  
會劉庠不散青苗錢安石白上徙使河東擢寶文閣待制知慶

州進龍圖閣直學士卒年六十贈諫議大夫子得君弟臨

宋史列傳

按廣淵宋史謂其小有才而善附會亦以呂公著等劾其掎克迎合朝廷意旨之故然不足爲定評也宋以不行新法積弱以至於亡而保甲保馬等法後世且延用至千餘年而公著等諸君子阻新法因劾廣淵新法非耶宋不用而亡後世用之不改也新法是耶廣淵遵旨奉法執行不擾胡所謂附會也史臣之不察終始輕論賢豪如此哉

臨廣淵弟字大觀起進士簽書雄州判官嘉祐初契丹使至朝論擬所應臨言契丹方饑困何能爲然春秋許與之義不可以不謹朝廷善其議累遷河北沿邊安撫都監上備禦數十策後

爲寶文閣待制

宋史列傳

### 楊聽德

楊聽德成安人元季累官尙書立身孤特不仕兩朝卒祀鄉賢

舊縣志

### 史鑑

附魁燁

史鑑成安人洪武初入太學讀書太祖嘗於暑夜微行見鑑讀書不輟異而問之對曰聖如大禹猶惜寸陰臣何敢虛曠以負作養上嘉之擢都御史時有宦寺謀干朝政鑑疏請防微杜漸又以用刑太繁疏言治新國宜用輕典上並嘉納廣平府志卒祀鄉賢裔孫魁魁字子解少有聲早失恃父喪明生計不足魁以舌



耕助之甘旨不缺以歲貢入成均居恒鬻笑不假處庭闈如嚴師焉門人及子弟列青矜者四十餘人長孫煒舊縣志

煒字明遠癸酉舉人授江南潁上知縣興利除弊課農桑集流離加意撫綏與父老相商藹若家人父子聽訟務得民隱民有過或寬之吏有過雖細必懲政成兩臺交疏其賢竟以勞瘁卒於官所著見著述門舊縣志

### 李果

李果字尙用成安人景泰元年

舊志作正統  
依通志改

舉人授平陽通判分

理易州廠有豪民長惡不悛果諭以禍福遂悔悟遷杭州同知築堤以障湖水居民德之有開湖偉績千秋利捍海高名萬古

傳之詩陞濟南知府卒著書見著述門

廣平府志

張憲 附智守諫昌

張憲字宗周成安諸生母喪三日不食哀毀幾絕既葬伏墓側不肯還戚友乃代為結廬憲朝夕哭奠負土成墳夜遇羣盜求火憲以無火應盜亦不忍加害景泰中旌後任山西布政司都

事祀鄉賢弟智 廣平府志參畿輔通志

智貢生官山西平魯衛經歷廉能有聲及歸授徒終老卒祀鄉

賢子秉彝貢士秉彝孫守諫 廣平府志

守諫字汝忠性直諒不伎求博聞強記年八十猶不釋卷每言

讀書先學耐煩然後有得舉鄉耆子所蘊生員孫昌 舊縣志

昌字澹寧性純孝登癸卯舉人潛心理學讀陽明致良知之書  
歎曰道在是矣以父年高養親不仕及卒哀毀幾於滅性家益  
貧守益固卓然係名教之重舊縣志

### 劉昌

劉昌成安人父淵任鄒平丞舊縣志昌敏而嗜學耿介有特操登

景泰丙子鄉薦歷官保德知州赴任不携家以清謹自勵苞苴

弗通年荒招撫流移賑活萬姓民頌德至今舊縣志

### 李岳

李岳字嵩山成安人宏治八年舉人謁選時或諷以納賄當事  
岳不可因選海州州判人皆不平岳曰吾知盡臣職耳敢論卑

乎抵任聽斷勤慎每事皆焚香告天兩臺已列薦竟乞歸

廣平府志

### 侯服

侯服成安歲貢任卽墨丞值朝命頒銀市米戚畹會昌侯孫繼宗弟顯宗攬納米患服持正遣使以幣至服卻之使怒吐服服笞之繼宗憤甚囑觀察使某誣以罪當流服子琛擊登聞鼓訟冤下法司覆讞繼宗復賂當事者嚴刑逼承琛一呼而刑折如是者七問官乃實奏英宗顧李文達曰皇親豈可如此遂遞繼

宗職諸黨悉伏辜服乃掛冠策蹇而還卒於家孫驄

廣平府志

驄以孝聞父疾五年朝夕不離側父歿不飲食者三日既葬欲廬墓以母在不果及母歿合葬遂廬守焉正德六年流賊肆剽

劫親戚勸之避以不忍辭弟明恐其不免相對泣未幾賊至兄弟爭死賊憐之遺緞一端書名而去嘉靖十三年奏聞詔建坊

以旌

廣平府志

按侯氏祖孫父子事義甚純正而舊志載之若有神助亦似忠臣孝子悌弟之名皆因神而幸成焉不亦失其實而短賢豪之氣乎父有冤子鳴之歷受刑訊而不屈兄有危弟赴之相與爭死而不去當是時豈復望刑拆與賊之遽走哉卽適逢其會亦不足爲訓也烏乎臣死忠子死孝弟死友愛無所希幸而萃於一門若侯氏者可謂賢矣

馬亮

馬亮成安人成化時知樂安縣清直廉明門無私謁

山東通志

### 李哲

李哲成安人以明經官陝西略陽縣潔己愛民不妄取一錢以

親老告終養歸卒祀鄉賢

廣平府志

### 高震

高震成安人以貢生令渭源縣有廉聲勤恤民隱歸卒祀鄉賢

廣平府志

### 張潤身

張潤身字佩德成安人正德九年進士知西安縣咨訪民隱清

理田糧得古人均田之意

浙江通志

擢御史授戶科給事中歷轉工

吏兵二科居諫垣十三年有蹇諤聲巨璫貪弁貴戚近臣多被  
彈劾忌者陰擠之出守平陽至郡問民疾苦百度嶄嶄居二載  
歸以耕讀課子敦睦族黨為事

畿輔人  
物考

李謙

附宗信樓鸞美

李謙為人忠厚醇謹處豐若歉明中葉以明經任青州府檢校  
歸田後隨歲不登謙輸銀四百餘兩賙給一鄉又設義學里中  
擇諸生中端慎者為師以訓其鄉之子弟成材者眾子宗信

舊縣

志參廣  
平府志

宗信性仁厚寬平任山東曹縣丞歸遇歲祲民辦賦不前監司  
催比急信傾囊金三千餘兩代為輸納有代種田者始取其租

後因歲荒各以其地與之里人稱之至令子棲鸞舊縣志

棲鸞性恭儉幼失恃善事庶母人不知其爲庶母也郡守陳公

慮滏河水將爲磚城以工資大人鮮應者鸞偕弟棲鵬往謁願

輸貲修城南面子應時任涇陽縣主簿應時子美舊縣志

美性謹樸雖席豐無溢志敦族睦里尤爲鄉邦推服子門琦崇

禎庚午舉於鄉早卒無子舊縣志

按舊志李譜論曰世家者以德以言以位不聞以財也而檢  
校乃世以財顯儻所謂好行其德者耶其論當矣而未盡焉  
夫邑乘紀實亦以風世也世道衰人情薄擁有資財者方思  
守之不易往往對於應納之款亦躊躇焉而不肯輸將一遇



時機困迫尤必多所顧慮多所盤剝乘人之窘而倍稱其息以爲不如是而財不聚富厚將不能永也烏乎觀李氏之世濟其美可以返矣

### 蔡紹先

蔡紹先字孝伯成安人性孝友拮据養親不以累諸兄爲諸生時有經世志嘗考方輿諸書凡海內山川險夷形勢無不洞晰嘉靖初以明經知長葛縣開渠田清徭役興學息訟多善政遷戶部郎中晚歸里分田贍族設立義冢卒子四長可教仲可賢均成進士

廣平府志

叔可行所著見著述門

舊縣志

可教字孟受性嚴重瞻視母回陝潼博士竇君愛之如子謂其

偶曰他日食蔡生報當過吾子孫旋成進士爲南陽司理晉民  
部郎出守德安以治行最擢陝西副使備兵潼關竇博士已沒  
升堂拜母置腴田百畝授其子遷山東僉事備兵遼海御史劉  
公以劾江陵緹騎被逮官屬不敢通可教獨往視而泣贈緹騎

使母虐江陵知之左遷行太僕丞歸卒子兆興

畿輔通志參  
廣平府志

可賢字仲聞性警敏豪爽多氣節嘉靖四十一年登進士授戶  
部主事監山東河南兌運繩奸釐弊風裁凜凜歷郎中遷太原  
知府有能聲擢霸州兵備道調岢嵐道時俺答黠悍因互市數  
要盟可賢單騎會紅門成賓主禮裁定馬價省費數千金以忤  
當道謝病歸壬辰時劉殺巡撫據寧夏叛召從軍贊畫屢出奇

計事平陸一級命飭兵遼東數月以內艱歸卒子應龍所著見

著述門

畿輔通志參康  
熙志廣平府志

按可賢昆仲當有明中葉處權臣壓迫之下獨能頭角崢嶸  
風裁標露已爲晚近不可多得乃一以泣視劉公違江陵旨  
而左遷一以威服俺答忤當道意而謝病棄官如傲蹠進退  
卓卓而不稍屈烏乎亦可以覘士氣矣

冷于冰

冷于冰字不華成安城內西街人洪武時名士冷謙來孫父松  
由舉人選授山東昌樂縣知縣在任六年有清正聲母吳氏甚  
賢于冰幼穎悟讀書日十行下爲人條理井然精采奪目如爲

趙公子作二十壽文其大較也

文見綠野仙踪

然數奇游庠後兩膺鸚荐

均被黜以此壽文而聲價騰嚴府相國嵩甚加器重聘爲幕友  
事無大小皆咨決之常面許以鼎甲之選適御史張翀以山西  
荒旱奏請急賑併指出嚴嵩壅閉聖聰嵩使于冰草疏辯護併  
坐翀捏奏災荒于冰以山西百姓爲重有忤嵩意嵩怒于冰不  
屈因辭嵩歸家居數年嗣以楊繼盛見殺王師獻述潘友士鑰  
相繼淪亡而權奸之威燄益橫遂棄人間事而隱於方外爲道  
焉說者謂于冰後仙去理或然歟

百川先生綠野仙踪

按于冰嘗論性命兼修之道曰神不內守則性爲心志所移  
氣不內固則命爲聲色所奪人苟欲念不生精不下流忿念

不生氣不上熾直與聖賢盡性至命懲忿窒欲之功隱然膺  
合此其誼求之晚近實如鳳毛麟角絕無僅有明季亂世安  
能容此才哉

又聞之父老云于冰娶卜氏生子一名狀元後登賢書縣西  
門裡道北皆其府舍舊址也今雖湮沒於荆棘瓦礫中爲他  
姓所有而有心人於荒煙夕照間流連憑弔尙指而曰之曰  
此冷氏之宮也爲歛歛不置云

李齊芳

李齊芳字見甫成安人學詩於李攀龍嘉靖三十五年進士知  
歷城縣時嚴嵩專政縣令每阿附之以博臺諫齊芳絕不與通

歷五載乃遷戶部主事世宗崩穆宗未卽位奄人傳旨除官中  
外駭愕而無敢言者齊芳上書語甚激烈上得書覽不釋手中  
貴銜之謫同州佐尋移衢州時防曠兵數千以知府給餉遲激  
變知府匿不出齊芳往平之官終漢中府所著見著述門

繼輔  
通志

吳一琴附一桂一檜

吳一琴嘉靖四十一年進士官工部主事弟一桂以明經官平

涼府通判異母弟一檜舊縣志

一檜雅尚氣節慷慨有膽畧雖未嘗學問而孝友天成一日一  
桂晏坐巷門羣盜突入執之矢石橫發里人莫敢近檜聞之挺  
身入曰幸寬吾兄財惟所取耳一桂囊無厚蓄未滿羣盜意將

苦之檜號泣曰兄年老無子財與身孰重乎羣盜感動首肯而去邑宰嘉其行會覃恩賜以冠裳檜堅辭不受

舊縣志

### 吳善言

吳善言字子遠成安人嘉靖四十一年進士歷工戶兩部主事轉員外郎督餉上谷積羨金數萬悉註冊存庫轉郎中出爲蘇州時方岳郡守卓異者二十五人善言爲治行第一賜金幣筵宴擢山西右參政累遷至浙江巡撫時政府議汰餉忌者因是以激兵變及入署善言橐中祇五十金耳一切供張均無異寒士乃各悔恨解散而善言意罷官歸子維東

畿輔通志  
廣平府志

維東字賓旭萬曆甲辰進士授戶部主事兩主國計捐潔無所

染遷荊州府三載荊州大治擢陝西副使漢中兵備道以忤巡

撫致仕所著見著述門

畿輔通志  
廣平府志

按吳善言及子維東俱以清風勁節推重一時然直道難容  
且享年不永崇祀之典缺焉惜哉

### 高瀛

高瀛字萃賢以明經任徐州判冰檠自勵民有青天之頌陞山  
西清源知縣益自刻勵以不能獲上罷歸嘗語人曰吾在徐為  
不虞之譽在清為求全之毀苟此心無愧其成敗利鈍何足介  
意士林以為名言舊縣志

### 陳忠言



陳忠言字子敬成安人嘉靖四十三年舉人初知河南密縣有異政歷任山東衡府審理正爲世子師以輔道功王賜扁以旌居鄉不入公庭尤爲人所推重

廣平府志

### 安謙

安謙字汝光成安人嘉靖中進士知樂安縣調吳縣吳故多豪猾有長役別役雜供億萬內外交困謙調停其賦吳人稱便時被倭蹂躪謙繕城垣修橋梁百廢俱舉升南京戶部主事以兵變罷歸年甫三十屢薦不出

康熙志參江南通志  
廣平府志

### 袁魁

袁魁字子選成安人年二十登隆慶二年進士知陽曲縣聽斷

若老吏晉王強占民田多役丁夫有司不敢問魁逐一查覆清  
出民田二萬畝民夫三百名民困頓蘇然性剛方不能俯仰流  
俗竟以此取忌罷歸弟瑰以明經官東郡有聲

康熙志參畿輔通志  
廣平府志

### 王家瑞

王家瑞成安人萬曆二十六年進士知咸陽縣不畏權焰力阻

開礦民感恩立祠所著見著述門

陝西通志參廣  
平府志舊縣志

### 唐珍

附若彝

唐珍字廷聘成安人入成均授山西陵川縣釐定里費侈征以  
蘇民困丁艱服闋補靜樂縣地瀕塞多警珍任偵謀謹烽燧民  
間安枕然性樸直不能事要人左遷永昌衛教授以親老告歸

子若彝舊縣志

若彝字化夫以恩貢選入成均授歷城丞問民疾苦以循吏自

期適因事忤司理司理思羅織以罪遂投牒歸

廣平府志  
參舊縣志

喬宮附騰甫撰

喬宮字應昌成安人以歲貢司昨城訓導修祭器濟貧生遷陝  
西安定教諭宮躬崇禮讓倡導士民不踰期士風丕變忤學使

者意遷晉府教授不拜歸卒子騰甫孫撰

舊縣志參  
康熙志

騰甫字舉之少穎悟日誦千言從父宦豫雍間覽太華渡黃河  
有翩翩遐舉之意遂薄舉子業刻意學詩一時詞人李見甫安  
汝光輩皆重之善書畫求者戶外履常滿性孝友質直坦夷不

問生人產簞瓢陋巷晏如也屢賓於鄉年八十推敲不倦所著

見著述門

舊縣志

撰字素元性鯁介廉潔以明經授任邱訓修文廟鑄祭器立社  
課業二年餘卒於任撰好學善誘從學者衆李門琦張宿等皆  
出其門無子弟姪束裝歸惟琴一張手卷四軸書百餘卷而已

舊縣志

### 侯君擢

侯君擢字際明成安人天啓元年舉人署大名教諭擢陝西甘  
泉縣殫心經畫民困以蘇丁艱起服知河南武陟縣以廉明愷  
悌聞升陳州知州甫之官而寇至同鄉官崔泌之率士民分堞

守身先士卒運木石擊賊城濠皆滿七晝夜賊遣使說降斬其頭懸城上賊怒急攻城陷被縛罵不絕口死事聞贈右參議祀陳州名宦祠更建祠於陳橋驛祀之廕一子入監讀書

畿輔通志  
參明史

### 陳廷謨

陳廷謨字獻明成安人天啓二年進士除山東沂水縣以卓異調益都上計以治行第一授河南道監察御史督鹽河東庚午流寇犯絳州廷謨登城指授方略擊賊宵遁以艱歸服闋奉命按蜀時流寇逼漢中藩封告急廷謨捐金充餉發穀賑饑助修廣元保寧城垣聲績卓著事竣就川南候代寇猝至不得已行撫軍事調兵措餉匝月圍乃解戊寅以疾乞歸家居八月而卒

所著見著述門弟廷諫

畿輔通志參康  
熙志廣平府志

廷諫字亮明幼與兄廷謨齊名以廩例入太學從兄入都兄感時疫幾殆廷諫延醫待藥逾月不倦兄卒謁選授周藩左長史御僚屬禁暴宗剛直動主遷武英殿中書克稱厥職以遷葬告歸清初屢薦不起明農課讀以聖學勉勵諸子容城孫奇逢常與過往講學以疾卒於家

舊縣志

### 蔡根

蔡根字汝培以明經授大名訓導擢良鄉教諭委署縣事陞永和知縣下車卽創建養廉倉以惠多士每年山租七百餘悉糴穀賑濟捐俸置社學創浮橋開索蛇川水利二十餘里至今賴

之以老告歸舊縣志

冀從勤

冀從勤字懷南性磊落不事生產業萬曆戊子舉人選知壽陽縣興學校賑貧民以內艱歸囊空如洗服闋補河津縣三月以

疾卒於官舊縣志

姜時敏

姜時敏字遜吾萬曆丁酉舉人授知齊東縣立義學治腴田以

養貧士陞臨洮府同知抵家以疾卒子遊龍官趙府審理舊縣志

楊純附惠心

楊純字惟一性至孝寬宏簡重生平未嘗歷邪狎與之遊者如

飲醇醪坐春風也至義所不可卽力持不相下以覃恩遊成均授臨淄丞攝隣封廉訪郤鏃減贖誅吏胥舞文者及歸送之者有一天霖雨千山潤兩月清風百世香之句以忤當路者左遷王官不仕卒子惠心

舊縣志

惠心字仲孚性穎悟博學多聞順治二年以恩貢選歸德府推官廉直有聲晉開封府南河同知金龍口決惠心揆宜度勢工成奏聞詔賜金陞開封知府以屬縣事註誤歸道染疾至家卒

畿輔通志參廣平府志舊縣志

### 冀弘道

冀弘道字性初性聰敏謹樸雅好古文詞以恩選入成均授寧



陽知縣刑政嚴明陞臨洮同知分署河州以直道忤時歸行李蕭條銷帶為資斧無愠色軍商遮道涕留勒碑誌德所著有東

西遊稿行世

舊縣志

王鶚

附推恩

王鶚字子恭世居漳河集為憲椽考滿赴選詣京授戊字庫大

使晉河南府知事清慎自守年五十餘告歸子推恩

舊縣志

推恩字伯厚成安人性孝友父鶚任河南知府以疾歸推恩飲食藥餌必親手煮進雖暑雨祁寒不稍懈題授平鄉縣訓導屢賓鄉校邑侯通門必式爭訟者望閭輒還壽九十五子一統

舊

縣志

一統康熙志作之統字萃州歲貢生性孝友妻亡不再娶修文廟立義學

居家多義行官趙州訓導崇禎十五年清兵破趙州一統死節

明倫堂明史參康熙志清朝入祀忠義祠勝朝殉節錄

陶盤附福介

陶盤成安縣人父卒臥於柩側者十二年及母歿遂合葬廬墓

終喪猶不歸竟卒於墓側事聞旌表祀鄉賢裔孫福介廣平府志參舊縣志

福介親歿既葬廬墓三年不返親友勸之不聽邑侯遣鼓樂迎

之不得已哭返後漸絕飲食而卒邑侯學宮表其門曰克敦大

本始終全孝廣平府志參舊縣志

楊時教附調鼎毓靈

楊時教字三泉性孝友少入邑庠以親老不仕曲盡孝思內外無閒言又輕財好施愚鄉人婚喪匱乏必助之設家塾教鄉族成材者衆子調鼎崇禎辛未進士任河南參議裔孫毓靈舊縣志毓靈字蘊輝號東園明辛未進士幼而聰慧中丙子副榜乙酉舉人歷任香河大成教諭旋遷祁州時有吏目凌辱庠生毓靈白學憲生員獲直閣校無不敬服後卒於官舊縣志

李璜

李璜成安人親喪廬墓以孝行著廣平府志 參舊縣志

安從善

安從善成安諸生時文廟鼎新獨祭器未備慨然曰有廟而無

器如黍稷何遂鬻田四十畝買銅若干鑄鐘壘凡十簋凡一百

一十俎豆凡二百九十貯學供祭

舊縣志

### 牛拱北

牛拱北耆老也言呐呐而好施濟學博武陟張君暴卒於官其子三人俱在籍不及含殮廩延劉公捐十金為置棺拱北有美材受金應之三子至仍還其金固讓不受

舊縣志

### 常仕

常仕成安艾東人

廣平府志誤作常仕艾成安人今依舊縣志改正

充正定營書四十年崇禎

末從征流賊受箭傷且死悲歌日報國一心終未遂願為厲鬼

向西征遂死撫院楊聞之嘉歎令厚恤之

畿輔通志參廣平府志

清朝入祀

忠義祠

勝朝殉節錄

高復興

高復興順治二年以貢生知平順縣平順介萬山易潛賊復興廣招募勤訓練約束嚴明奸宄慙伏不敢動乃躬課農桑土闢

民聚擢紹興府同知

山西通志參廣平府志

溫如玉

溫如玉字德甫姿性異人弱冠補弟子員順治九年壬辰進士授泌陽縣蒞事勤慎聽斷廉明以治行卓異入刑部主事轉郎中出督贛關權務遷江南僉事攝蕪湖鈔關事所在惠愛廉能

祀鄉賢

畿輔通志參廣平府志舊縣志

李崇節

李崇節字子達事母以孝聞宅田盡讓其弟業麟經教授生徒不問束脯邑侯麻城劉公豐城李公造廬隆禮比之段干木以歲貢司訓饒川再補臨穎攝縣事不事紛更而百里帖然轉安平教諭陞山丹教授歸子孫皆讀書繼其志

舊縣志

王元鏞

王元鏞字玉乘貢生可敬子也性英敏行誼端潔爲諸生時以說書課文爲事士被其教者不可勝數順治十八年恩貢康熙二年舉於鄉甲辰成進士選內弘文院中書舍人有清以來文章德行稱併美者無出其右未幾以病告歸卒

廣平府志  
舊縣志

劉三畏

劉三畏字子敬性至孝事親動必以禮治宗田立義塚時稱爲

白衣進士子六皆成立

舊縣志

常天祐

常天祐字矛懷成安西馬村人幼貧從學於廣平生員張茂梧終日咕嗶午甑不炊淡如也入泮丁母艱朝夕哭奠如禮時大饑斗米一金不能葬民皆相聚爲盜祐欲他往以母柩在不忍赴學領賑得穀三年負至中途爲賊所奪且欲擁以爲首祐給之曰歸家辭母明日從汝賊乃釋之祐歸於母柩前痛哭遂縊死明日賊來見祐已死羅拜痛哭而去其鄰生張浩率鄉人葬

之時明崇禎十五年也祐無後貢生侯鎮國傳其事舊縣志

### 王懷德

王懷德字培初成安廩生母早卒事父及繼母以孝聞居喪哀毀過甚容城孫奇逢遺之詩有居憂自有禮夫豈爲聲聞邇室能無愧清評已屬君之句與僉事溫如玉中翰王元鑣爲文字交子心簡沖齡入泮舊縣志

### 傅明德

附廷宣

傅明德字在明漳河集人總角卽潛心讀書爲文兼韓柳歐蘇王唐瞿薛之法以恩選入太學捐介有守丙午舉於鄉未幾卒

### 曾孫廷宣

舊縣志



成安縣志  
廷宣字子達康熙丙午舉人早歲入庠性純善施暑天設茶水  
以濟途人春冬月施粥濟貧賴以生全者甚衆舊縣志

### 張躍龍

張躍龍字見田成安增生世居南留村曾祖廷美與其從弟臻  
同居不折臻之嗣廷美子守已克承先志與胞弟同居守已子  
孟春與堂兄省祭官堯科胞弟孟夏同居時內外眷屬至三十  
餘口而堯科在官爲吏支應維艱凡公門及私家所用皆孟春  
經營之至鄰里宗族有婚姻死喪財用不足者輒調給無吝色  
及卒遺孤躍龍甫四歲家務悉托孟夏孟夏事孀嫂撫遺孤無  
私蓄族黨鄉里咸服其公推爲鄉約長嫂馮守志事舅姑以孝

處妯娌以和紡績佐叔訓子讀書壽七十二歲無疾而終躍龍處家里黨間以孝友稱與堂元化成堂弟遊龍不異同胞化成失偶未娶躍龍子勉亦失偶化成曰家貧力難併娶然我暮年人也當先爲勉娶躍龍曰焉有不爲兄娶而先爲子娶者竟用力先爲兄娶而後及其子自廷美至躍龍歷四世矣尙同居雍睦如故

舊縣志

### 姜雲龍

姜雲龍字會方性孝友樂施濟謙恭儉慎與世無忤嘗捐百餘金立祠堂建義學一所復置地五十畝作學田爲延師束脩之資鄉中子弟願學者皆讀書其中人皆德之子君顯順治乙酉

科武舉 舊縣志

白奏議

白奏議諸生璜子性至孝甫十歲父卒時弟四歲妹尙在襁褓家貧母任氏垂涕曰爾曹孤幼能保將來不爲不肖乎奏議泣對曰母勿慮兒必竭力讀書克承先志斷不敢貽父母辱十六歲入泮十八歲食餼天啓辛酉舉人署丘縣教諭丁內艱歸卒於家 舊縣志

王順命

王順命成安廩生 舊志漳河集人 幼孤竭力事母雖粗糲必恭謹母卒哀痛迫切既葬晝則守墓晚則臥主旁三年如一其教人先德行

後文章不計束脩貧者仍助以筆墨之資學使蔣公嘉其義賜

銀五兩書二部

廣平府志  
舊縣志

### 樊正域

樊正域字海截幼聰明穎異後入泮督學李光地奇其才選爲貢元李遷本省督憲提入省城蓮池書院肄業凡六經奧義及諸子百家無不貫通學業大進康熙戊子舉於鄉辛丑成進士授雲南富民令頌聲卓著以清慎勤擢戶部主事旋升員外郎因病告歸遂絕意仕進杜門不出二十餘年太守吳谷舉鄉飲大賓表其門曰鄉國達尊以風士庶子倫杉貢生授通州訓導

畿輔通志參雲南通  
志廣平府志舊縣志

安桂香

安桂香夏陽村人立心忠厚處世和平舉鄉耆常積錢百貫濟人之急及病篤命子貞吉悉焚借券曰汝不聞古人有子孫強似我要錢待如何子孫不如我要錢待如何之言乎舊縣志

張名遠

張名遠潭河集人爲木工性醇魯寡言常結社施茶戴薪負水不倦歲秒入市拾金數兩不去待遺主還之候生鎮國聞於縣舉鄉耆舊縣志

溫恂

溫恂成安監生康熙中官重慶通判清兵征吳三桂恂司糧餉

銖粒無悞轉運之費悉捐辦之事賴以濟

四川通志

後官廣東提舉

廣平府志  
舊縣志

### 程元英

程元英字敬之河腫人邑庠生性剛方峭直好扶弱抑強善爲人排難解紛人有爭者咸取決焉年八十無疾而終

舊縣志

### 王京

王京字君所邑庠生性端直父卒體繼母意收養其前子後給地三十畝莊一所又買人田地已交價及丈量畝數不足賣生欲退價京憐其貧慨然不受

舊縣志

### 王聰

王聰字明菴國子監學生少失怙事母曲盡孝道而尤好義樂施凡親鄰婚喪有不能自治者咸量力周給有卜葬無地者卽借與地若干畝舊縣志

侯芬

侯芬字帝歆增廣生性敦篤每於冬月設廠煮粥以濟貧人鄉鄰中有婚喪力不給者皆厚助之舊縣志

董晟

附吳灝

董晟字宋音太學生李家疇人性醇厚果於爲善聘名師吳灝立義學招來磁州邯鄲肥鄉成安臨漳魏縣七處青年入學肄業有貧不能自給者助之食前後四十年餘成就諸生二百餘

人乾隆五年河南巡檢雅題其額曰成就後學灝字望予邑貢  
生性聰敏博學工文受屢聘為諸生師二十五年舊縣志

### 石僎

石僎字良菴雍正年貢生肄業省城書院學甚純正邑令徐時  
作慕其品使子弟師事之馬鵬雲為之作篤行歌見著述門廣平

府志舊縣志

### 郭本生

郭本生雍正年貢生秉性端方讀書務求實際鄉人有不規於

正者憚見之廣平府志舊縣志

### 李懷禮



李懷禮東河人家頗殷實僮好施予鄉族有婚喪事貧乏不能備禮者懷禮皆給金助之小堤西等十二村遇荒乏食懷禮周糧數百石全活甚衆晚歲子孫繁昌廩生學召增生學榮經慎皆其孫也

舊縣志

### 孔學洙

孔學洙陽寺屯人太學生爲人慷慨好義邯鄲百川號商人過其村遺銀二百兩洙拾之隨時遍貼字樣以示不昧後遺金者至說符物色數目卽刻還之酬謝不受

舊縣志

### 楊六藝

楊六藝字貫一高陵阜人太學生天性豪爽慷慨好義不問親

疏遇困乏者輒周給之有婚葬力不贍者極力助濟而未嘗有德色好結納嘉賓燕會有座上客嘗滿樽中酒不空之風

舊縣志

### 陳爾達

陳爾達字子上由生員入太學例授州同知賦性醇謹家雖世閱而嘗布衣疏食遇貧窮婚喪者輒捐貲助之無力讀書者代出館金一時賴其力全者甚衆

舊縣志

### 陳其皓

陳其皓字迎旭由太學例授州同知世華族性復豪爽設藥室濟貧病助婚喪施葬地美不勝書

舊縣志

### 朱鳴

朱鳴字岐音號雪巢工詩古文督學使者李光地邀入幕辨晰名理推爲前輩先生雍正元年舉於鄉著有雪巢吟

畿輔通志  
廣平府志

朱京

朱京字無極號守一嗜學不厭家貧嘗點香火照讀年十八入庠寓讀於鳳凰台從遊者皆知名士門人鐘光序陳均皆早登鄉榜京以數奇三薦不售乃設教於樂育堂謹言行嚴操守足跡不履公門邑候李內翰熊嘗造訪焉稱爲澹臺滅明弟章

縣志

章字大文幼聰敏以家貧十四歲始讀書受教於兄京三年卽能文十八歲入泮二十歲食廩餼南遊遇同人授以元燈歸而

肆志不解衣者三月豁然有悟說書不襲舊義講義但玩白文  
衡文得失無或爽者乾隆十七年以恩貢成均舊縣志

### 趙繼抃

趙繼抃字琴一拔貢親喪臥苦枕塊三年未嘗入內室弟寡甚  
衣食必共或至轉相稱貸以與之至老無間學使聞而表其門

畿輔通志參廣平府志舊縣志

### 張益潛

張益潛字孔昭邑庠生繼母王氏性嚴益潛承以色笑父歿事  
之尤謹王病朝夕侍奉八載無倦奉題旌表畿輔通志廣平府志舊縣志

### 潘興邦

潘興邦鄉義人以燒瓦缸爲生親在飲食不敢先嘗與親友食  
首饌必以器盛之歸遺與親親亡自燒瓦器書其親生辰年月  
以充誌石廬墓三年每食必祭事聞建坊旌曰孝友可風好事  
者志其墓曰瓦缺墳

畿輔通志參廣  
平府志舊縣志

### 安中鄰

安中鄰岳固人家極貧業農早孤事其母無文飾朝夕惟依依  
孺慕或有故出必囑其妻小心服事歸扣起居焉母卒喪具不  
扳其兄鄉黨稱孝

舊縣志

### 張可富

張可富河腫人市豆腐爲業母早卒事父篤孝年二十一值父

生日思以異味獻自割股肉父卒廬墓三年邑候趙元祚以愚

孝難及四字旌之

畿輔通志參廣平府志舊縣志

### 袁顯

袁顯史家莊人世業農幼喪母行年六十每至母喪日猶痛哭如初喪其父年老病癱好遊城市常負之進城擇市中甘旨進之侍其側依依不離暮負之歸數年如一日父卒葬後每夜臥主旁與人言及其親必流涕教諭劉廷遴表其門曰孝德真純

畿輔通志參廣平府志舊縣志

### 霍種德

霍種德北漳堡人幼失怙恃依兄嫂兄病篤寢食不離兄卒檢

生時鄉黨借券約錢三百餘貫悉焚之撫養兄子俱成後異爨讓地三頃人問之曰以報吾兄卒後本村霍立元補欠金其子孫不受元遂買樹植其墳

舊縣志

### 蔡四達

蔡四達夏陽人兄出嗣父當病篤恐出嗣子後空乏父卒四達體親心卽延親族哭訴先志將遺產讓半於出嗣之兄後諸姪乏食亦時周給

舊縣志

### 郭文銓

郭文銓字中選號野塘郭家村人楊毓靈門人也善文工詩乙酉舉於鄉與毓靈同榜授豐潤縣教諭諸生遊其門者甚衆

舊

牛體仁

牛體仁字無一號蘭溪漳河集人五歲失怙六七歲卽知讀書家貧不能延師其母文安舉人高令樹之女少知書口授小學論孟內則諸篇鄰人增生師桐愛其器不束脩而教焉十七歲入泮庚寅舉於鄉桑硯爲業遊於門者甚衆

舊縣志

趙廷儀

趙廷儀字文甫縣學廩生北漳堡人性嚴正喜讀書七歲喪父聞書聲卽訴於母馮氏而求學焉入庠後設帳於家立訓先德行後文章課文以大家爲骨時文爲肉從學成名者三十餘人



成邑稱良師焉舊縣志

朱霽

朱霽字璘若品行端方博極羣書家訓嚴肅教子讀書不容少  
有怠忽訓迪生徒務求各成一體以貢生選授沙河縣訓導嚴  
道範端趨向課士有法邑人皆謂得師範焉三子俱以貢顯舊

縣志

朱世瑞

朱世瑞字輯廷號拙存清乾隆六年拔貢幼讀書五行下工書  
善吟落筆數千言就授安徽廣德州州判以年老未就所著見

著述門

畿輔通志參廣  
平府志舊縣志

朱世瑗

朱世瑗字念蘧賦性狷介孑然自守尺寸不踰爲諸生時嫉城市喧囂遷於鄉隱居教授一時生徒沐其化皆能立身砥行爲端人終其身未嘗至公庭接人以和絕口不言世事家愈貧而學益力後舉明經無意仕進一時重之有苦節可貞之論舊縣志

吳美

吳美張家莊人家赤貧佃地爲業其父好酒百計圖之以悅父心嘗於困極時典身上衣沽酒以進不使父知事繼母亦以孝

聞

舊縣志

徐有典

徐有典字敦五成安諸生天性孝友父母病二十二年有典進湯藥調飲食無懈意父死晝夜侍母左右有典新婚母遣之去泣曰母之日短兒之日長何忍旦夕離耶嘉慶初知縣孫培增

旌其門

廣平府志  
舊縣志

遂韜

遂韜成安人事親盡孝養已所置產悉與諸弟共之爲學務實

踐以仁讓化其鄉卒祀鄉賢

廣平府志  
舊縣志

靳方升

靳方升字旭輪成安貢生治喪依文公家禮三年不入內舍負

郭設塾貧者助其讀從遊者百餘人

舊縣志

武濯

武濯字漢水號千柳以善講五經名世四方來學者甚衆於城東沙河村種柳樹千株置亭於其內題曰千柳亭朝夕吟咏其間邑侯馬晃慕其高志贈以經學鴻儒匾額舊縣志

侯文炳

侯文炳邑諸生性英烈品行孝義赴胞叔難殞命邑令熊恩紱教諭米馥均表其門當時監生吳雲龍武生潘從乾諸生周訓等咸以孝友稱廣平府志  
舊縣志

池汲修

池汲修字晉齋幼善騎射年十八中嘉慶武舉任山東平山前

幫領運千總以勞績升東昌衛掌印守備公忠自持不受苞苴  
威令嚴肅軍吏畏而愛之值運糧時不辭勞瘁上官獎以勞冠  
儲軍匾額去任日軍吏父老遮道攀留在任三十餘年宦橐蕭  
然歸里與兄同居視猶子如已出教養子姪文武各因其材五  
世同堂年七十二卒子三長珍訓導次璽典史三珂武庠生

府志

### 李鐸

李鐸字警之增生博學能文同治初東匪擾境鄉紳李申之等  
舉辦鄉團規模法制皆鐸裁定後團勇與捻匪接戰鐸率丁役  
往援身受重傷賊退後數日因傷歿鄉人追念之子書雲卿雲

俱庠生

廣平府志

黃鶴舉

黃鶴舉字羽卿道光己酉拔貢父大士字懋修有盛德鄉人推重凡邑中築城濬池籌勇糧皆首先捐輸以爲倡同治癸亥鶴舉爲紅衣賊執脅以利刃不屈俄一賊馳至大聲呼曰此先生長者也毋得爾賊去遂獲免工詩善畫同治丙寅卒

廣平府志

李節之

李節之成安諸生同治元年捻匪逼城與職員李玉之李鳳翔

王文昭諸生張麟書等分團禦賊陣亡

畿輔通志  
廣平府志

李湘

李湘字景淮少孤事母孝剛方素著同治初教匪擾境縣令招議城防策井井有條登陣固守不遑寢食者數月縣令每語人曰此南城保障也歿後士人爲立教思碑

廣平府志

霍浩然

霍浩然監生同治元年賊將至浩然在村外與賊約給銀若干馬數匹不令入村賊許之後賊多復擁入浩然大罵責其負約

遂遇害

廣平府志

武珍

武珍同治元年隨鄉勇與賊戰敗歸家聞父被擄單身復入賊營遇父被縛將殺誘許馬匹令父歸取以身爲質父得逸而珍

遇害

廣平府志

劉步青

劉步青乾隆時邑庠生輕財重義與弟增生步錦議創立義塾步青施學舍一區步錦割田三十畝爲塾中脩金膏火之費鄉人義之有難兄難弟之稱

趙璽

邑人趙璽字國珍故清之世家也生於嘉慶初年十九歲離父自立企業致富經營商號有七興二合之稱田園數十頃起厦屋頗雄壯自門首至正室成一直線形層門有九外人稱爲九門趙家遵例報捐州同生性慈善好施治家處衆嚴而有禮每



逢歉歲及大小公益事無不量力捐助鄉族佃戶有喪慶事及貧不能舉火者常得周濟以故人咸敬畏之所傳影照猶在光緒四年家業漸替又值晉省大飢流氓塞巷其孫輩善承祖教猶出糴煮粥施賑全活甚衆嗣後邑宰蘇殿華創立義塾倡義捐助城內東街市房一所以作塾地

現在教育局即其遺址有碑可考

其所居邑東

南村臨大道當山左山右東西來往之衝要至今行人過此猶

口碑載道望門稱良善家焉

採訪冊

### 張沆度

張沆度字鶴樵成安北魚口人幼聰慧爲文風韻有奇氣不受舊學羈勒而書法尤秀美常書杜子美秋興八首刻石藏於家

中十四入泮十八中嘉慶辛未舉人道光九年己丑成進士授翰林院庶吉士逾年奉部委盤查鉛庫此事向來由前任與後任通融分潤名爲盤查並不認真而沉度率吏澈底清盤非認真查驗不可庫內鉛件檢點未半當權者恐不便於己陰搆主管衙門撤沉度差而沉度亦以世不可爲慨然棄官歸爲正定阜平書院山長數年鬱鬱卒

### 耿維新

耿維新字振基成安人原籍寧晉嘉慶十八年隨父遷成家北潭堡父罄性豁達不事生產業常兩聚千金而兩散之維新幼時卽好儉節用然不忍拂父意常與母約置布囊書篋中將日

所得錢除少許暗納囊內久之成巨款家業中落資之以復振及長經商操禹稱業以公平眞實權物之出入遠近爭趨赴之以故生涯日茂不數年置良田四百餘畝一時倚市門者咸稱爲有茂少伯風然性仁孝事親視父母所欲力爲備具自奉約而對人則好施予道光二十八年咸豐七年兩次歉收鄉鄰以什物求售者必給以平價有告匱者必多方賙恤使完聚而止同治七年捻匪張總愚犯境携家入城亂定歸至中庭有女啜泣甚哀知被擄詢之云臨邑羅莊李生克儉女食之食資送歸里旋李携土物橐貲財踵門謝乃收物卻貲款留二日而送別其仁至義盡如此烏乎世道衰人情薄雄於資者平素持籌握

算權子母析及錙銖一遇災荒窮阨莫不乘人之窘而高其利  
率至有奇物可居尤必多方敲詐勒索意外之報酬聞維新之  
事其亦知憬然悟乎維新雖徒手興家而延師教子不惜重金  
故子孫多顯貴卒於同治十年八月年七十一子二文光文明  
邑庠生孫二介之文光出仰之文明出早世曾孫四肇璠肇琪  
肇璘采章均介之出肇璘采章出嗣仰之玄孫大偉大猷肇璘  
出大同大年采章出

採訪  
冊

### 劉玉樹

劉玉樹字重器厚重寡言文章振拔英氣逼人弱冠補諸生食  
餼公車凡十餘上皆數奇不遇乾隆五十九年貢成均嘉慶己

已恩賜進士國子監學正授徒數十年所成就多佳士如貢生  
劉坤廩生馬鵬程其尤著者幼孤事母至孝人推重之

趙錦

趙錦字文中成安店上堡人道光三年貢生志行端慤學由博  
返約以通經致用爲主著羣生寶鑑二十卷精義微言多前人  
未發之秘其立志窮理二卷尤爲永年閣允中先生所推許

訪冊

劉其綸

附灝鳳章

劉其綸字縉如號心齋成安城內人弱冠入學食餼卓卓庠序  
間道光庚子舉於鄉益加勤奮邑侯尹慕其學品端粹延至署

使諸子師事之相得甚間則評論詩文終未嘗有所干請未幾  
主講本邑聯輝書院於生童誘掖獎勸惟日孳孳一時王君夢  
熊等數人均獲雋性純孝友于兄弟與人交則溫柔敦厚故鄉  
里至今傳播而贊美之以揀選知縣年五十九卒子灝溶

採訪冊  
邑人黃

金策  
墓表

王維翰 附士彥懷珠

王維翰字宗城成安沙河人幼聰穎好學稍長究心經史嘗讀  
春秋慕童汪錡之爲人清道光二十五年入邑庠旋補增廣生  
以國內亂不習舉子業教授生徒以自給其教人以敦品勵行  
砥節立名爲宗一時守其學知名當世者以十百數乃憤洪楊

蔓延江湖又慮捻匪張總愚焚掠山東延及畿輔常語人曰大丈夫不能統百萬兵掃清寰宇亦當練團築堡保障一方咸豐八年捻匪勢愈熾維翰奉大名道聯本邑令張檄爲城東四十八村寨首用防匪亂官府倚之若長城矣未幾捻匪由東竄入縣境維翰率鄉團極力抵禦因衆寡不敵單騎赴賊壘冀以理諭賊益橫維翰不爲屈遂遇害時年四十有二也事聞賜世襲雲騎尉祀縣忠義祠子士彥殿士

採訪冊參邑人張永和所撰碑文

士彥字千人宗城公遇害時年方十二家極貧從貢生韓允殖學允殖不取束脩同治十三年入邑庠以教授生徒爲業列門下者常三十餘人士彥精於易推卜輒中且性謙和終其世與

人無口角爭其弟殿士持家有道處事甚公亦爲鄉人所佩服

卒年七十子懷璧

採訪冊

懷珠字聯美殿士子行二族居於成安縣之沙河村性忠誠負  
勇敢氣寡言語勵實行視人事如已事幼多病然不畏險阻當  
七八歲時患痺甚劇命幾危賴伯父士彥苦心調治始得痊愈  
越三載與諸兒戲登高臨深無難色一日墮薯井中右肱爲拆  
復瀕於危經醫醫以接骨法數閱月原狀乃復卒無恙父母喜  
相謂曰次子兩經難關無虞其不壽矣少從伯父讀書畧通大  
義及壯工作尙勤儉操持家政內外得體愛鄰睦宗無人已之  
見存數年來家致小康固由於乃兄懷珍之舌耕君之力亦有



足多者居與從兄懷璧之屋舍毘連（懷璧君之伯父次子）君素念伯父再生之恩久蓄報德之志適正月七日夜盜匪來劫欲得懷璧弟兄而擄之君聞警疾起伏房上以瓦投匪匪發鎗射之顛遂飲彈而歿時年三十有九遠近哀之嗚呼君之一生數亦奇矣患痺未死墮井未死勤勞而健壯已無可死之理矣而竟死於匪不亦慘乎然死爲人所必有值此澆薄之世人情趨利而避害君獨能急人之難奮不顧身以至於死雖報德居心洵晚近之翹楚也如君者可以風矣

趙璐

趙璐字佩旃東關南街人幼穎悟讀書過目成誦十二歲應童

子試揭曉後其父抱之觀榜旋入泮科歲試嘗冠軍因食餼鄉  
試三薦未售均挑膽錄教授生徒數十年游庠食餼者不可俁  
指數同治二年捻匪犯境邑侯楊公請練鄉團爰於東關四街  
修寨門築圍垣鑄大礮六罇該匪繞城而過卒無恙邑侯以城  
獲保全佩旃公之力居多具表上聞上嘉其功以訓導用註冊  
未及選卒於家子三長毓椿增生次毓槐廩生三毓棠增生  
毓槐字植三璐次子也年二十一入邑庠越二歲璐卒家無寸  
土三弟毓棠僅十歲眷口十餘人無衣食資毓槐以舌耕餬口  
授徒督課外無餘事螢窗雪案二十年無倦容毓棠於二十五  
歲以案元入泮毓槐曰我死至九泉下亦可以見先父矣旋卒

年四十六孝友可風而壽不永惜哉

劉環洲

劉環洲字春溪邑西南鄉南徐村人幼入邑庠家道殷富清道光年間歲饑縣公倡辦平糶籌備賑務公慨輸巨款躬親服務事賴以成並設粥廠及施衣等事蒙邑侯王大令請獎給七品銜以州判補用繼加捐刑部主事在京供職十餘年與翰林院庶吉士倪文蔚結道義交最契至咸豐十一年實授刑部湖廣司主事晉加四品銜以道員外任未及分省因病卒於京一切衣衾棺槨及運靈等事深得倪公之力焉子振聲振鐸振綱

採

振鐸字警之前刑部主事劉春溪之次子也幼聰慧隨父春溪公讀書京寓受業於倪豹臣朱彛伯兩先生十七歲入邑庠迨春溪公歿丁憂在籍捐資立義塾於村東別墅親自教讀就學者不計束脩貧甚者畀之食遠近鄉村成全士子無數舊址今仍在焉服闋後因科第未遂援例捐納候選州同至光緒九年倪豹臣巡撫廣東隨之任所主文案事後蒙倪公薦任廣西鹽務督辦差竣保陞過班知縣歸直隸候補至光緒十一年卒於保陽差次遺二子甚幼長金策次金襄賴季弟重三公教養兼施循循善誘二十餘年弗少懈金策另有傳金襄十八歲入邑庠旋入北洋陸軍講武堂畢業後歷任軍官

採訪冊

金策字運宸幼聰穎讀書過目成誦早失恃未三年又失怙事繼母以孝聞母氏李待金策寬嚴得體飲食衣服稱其所欲惟一息廢學鞭撻不少貸其叔父重三亦時加督責以故殷殷就學如蛾子時術焉年十五入邑庠二十領鄉薦嗣又考取內閣中書戊申肄業保定高等師範學校卒業後卽任本校教職員口講指畫娓娓動聽學者靡不心服不意因勞成疾卒於民國五年六月年方三十六子博泉

採訪冊

### 蘇琴堂

蘇琴堂字雅南北渚村人清光緒戊子貢生爲人闊達寬和事親以孝教子有方子二蘇欽蘇鐸同入邑庠世代書香至今稱

望族焉四年歲大饑在本縣倡辦平糶知縣蘇殿華由山東境購糧路經楊固縣被該縣民衆將糧扣留蘇君前往交涉卒能將糧運回以救饑饉一時全縣民衆羣稱活我者蘇君也後經知縣請獎平糶出力人員蒙前直督部堂李彙奏給獎貢生加州同職銜旋以候選教諭咨部註冊補用未及到任卒年六十

二

### 劉坤

劉坤字厚成號璞山成安北鄉義村人咸豐六年貢生幼魯鈍嗜學長尤刻苦老而彌篤以經猷濟世爲己任教人重實踐多所成就性誠樸與人交推心置腹無虛飾語言行足爲世楷模

貢成均後鑒於貧士困難創立帮貢議單以免後此出貢之累  
士類便之所著論語篇次序傳二篇精義微言發前人未發之  
秘世目爲純儒光緒中選栢鄉訓導時距卒已二十餘載未得  
赴任識者歎吾道之窮云採訪冊

董航

董航字普濟南區李家疇人幼事父母以孝聞長嗣伯父尤醇  
謹伯母有疾視侍湯藥衣不解帶者數十日夜嘗焚香默禱願  
以身代事雖已往至今猶膾炙人口而尤樂善好施凡親鄰婚  
喪貧不自給者量力周濟之一時賴其補助者甚衆四鄉公爲  
勒石以誌思慕不置云採訪冊

## 黃金詔

黃金詔字綸甫邑西黃郎堡人天資穎悟喜讀書善爲文書法精絕士人臨摹者甚衆童年遊泮清同治辛酉科拔貢公與堂兄金科析居有年後金科家計蕭條債累千金又值早逝二子皆幼弱公爲之經營家政教誨孤姪凡索債者悉出已財以償之數年家業如舊至同治癸亥間山左逆匪蹂躪數次村人殉難者數十餘人廬舍灰燼慘不忍睹公與族兄金策鄉耆趙炳楊元吉會議築寨防守克期而工畢戊辰南匪入畿內一村皆獲保全鄰村避難者亦保全數十百人及今土匪猖獗郎堡獨稱完善父老咸稱楊曰昔與今皆金詔力也晚年習岐黃尤精



于咽喉求治者門嘗如市自施藥鉅著手卽瘥雖嚴冬酷暑未嘗有倦容鄉鄰均感其德匾其門曰惠孚桑梓云

採訪冊

### 王慶潮

王慶潮字瀛洲成安城內人幼穎悟讀書能闡明事理雖老師宿儒善解經者亦以爲不如入庠後以明經歷署望都邢台柏鄉靜海武清阜城元城鉅鹿等縣教諭所至有聲而任邢台時擒匪北竄邢適當其衝全城危甚一夕數警慶潮爲守令畫城守之策籌抵禦之方日夜登陴激厲士卒十數日不懈城得保全然匪自孟津覃懷以來脅從者多良賤逃歸過邢誤爲村堡所戮甚夥慶潮察其爲民也卽白守令給以護符資斧送還鄉

完活無算其居家以孝謹稱母疾劇嘗自齋戒露禱於庭疾輒  
已由是朔望齋戒以爲常至恤貧族設宗學築邑城建文閣修  
橋梁廣鄉塾賑饑黎平糶值賓寒峻興樹蓄凡諸善舉靡不勇  
爲尤其餘事清光緒三十年事聞奉旨以樂善好施建坊於里  
第又以子夢熊功賜一品封典卒年八十八子三夢熊夢魚夢

燕

採訪冊參寧河高賡  
恩墓誌銘序

夢熊字渭岑幼穎異讀書日萬言鄉里間以神童目之稍長游  
學都門受業倪中丞豹岑極見器重年十六應童子試輒冠軍  
補弟子員同治壬戌舉於鄉乙丑辛未皆蒙薦未售遂不事科  
名以知府需次河南矣到省歷辦固始賒旗禹州諸權務皆記

大功適鄭工石橋決開陳所屬十餘縣蕩析離居嗷鴻徧地乃  
派辦朱仙鎮留養事宜施粥施賑悉心籌募十閱月晝夜不息  
全活十餘萬衆升署歸德在任聽斷明決捐廉爲文正書院膏  
獎諸生感戴勒石以誌調署懷慶愛民勤政廉潔自持民間因  
爭水利械鬪連年夢熊據理剖斷紛爭立解先是充賑撫總局  
提調有功保補缺後以道員用至是過道班充善後支應局總  
辦嗣以江皖豫三省會剿渦陽土匪功保加二品頂戴庚子之  
變裕中丞壽泉派兵勤王籌餉運械相倚如左右手又因籌辦  
嵩武軍餉有功東撫袁奏保交部從優議叙旋委經理營務處  
加一級遂請從一品封典爲榮祿大夫署糧儲鹽法道豫撫林

以整頓通省車馬籌辦學堂巡警改良監獄并爲百姓裁減浮  
派保加按察使銜豫撫吳又檄署開歸陳許鄭河務兵備道在  
工率官役固隄防伏汎皆平以功交部優叙陸軍部剖委調查  
河南陸軍財政局會辦豫撫寶復委總辦陸防軍械局中外倚  
如柱石方欲大用而夢熊以父年老棄官請終養歸焉回籍後  
除娛親外戚族鄉里有貧困者皆賙給之一率父樂善好施之  
舊民國八年卒年七十七所著有中隱齋四則藏於家子三珊

琛璟

採訪冊參邑人張  
永和所撰墓表

珊字海秋清光緒乙酉拔貢朝考就教選授臨城縣教諭諸生  
來學者咸得其益以前在河南朱仙鎮轉運東漕功保得缺後

以知縣用遂過班知縣指分山東併加同知銜復以楊莊堵口  
功保補缺後以直隸州用加一級准補高苑縣知縣卒年五十

一子兆義

採訪冊

琛字韻笙清光緒三十年由廩生襄辦昭信股票有功保獎州  
同分山東河工試用宣統元年調往浦口江防營管理江防營  
餉項事務三年以母病回籍卒子兆曾兆普

採訪冊

趙炳

趙炳字明遠世居城西北郎堡事父母以孝稱築寨之功尤卓  
著者也當清同治初年山左逆匪蹂躪畿南焚村落戕人命不  
可勝數公睹之慘目傷心遂謀諸鄉耆黃金詔黃金策楊元吉

欲築寨以禦患衆皆首肯不數旬而工畢是時工程浩大需財甚鉅公先出己財以償之鄉鄰之鰥寡孤獨不責其償而且焚其券一時功德洋溢乎鄰村今時之士匪充斥獨北郎堡完善皆炳之力也

採訪册

### 高桂

高桂字秋卿成安東關人幼篤實經義必求深透爲文敏練而筆力沈着入泮後選同治癸酉科拔貢光緒八年壬午舉於鄉爲第八房經魁因世途險惡不求仕進遂設教以傳道授徒爲業光緒十四年授大城縣教諭十六年以病歸卒於家子聯升

採訪册

韓錦堂

韓錦堂字榮齋西姚堡韓允殖之子也受庭訓二十歲遊泮二十二歲補廩膳生鄉試屢荐未售錦堂淹貫子史精通經義先後講學閱二十年以敦品勵學爲主旨從學者率多品格清白學術純正之士性和藹與世無爭出言謙遜雖村婦販夫均樂近之戊戌變政後公觀時局將大更張科舉絕不克久存自是漸趨重實學家薄田數十畝收歸自種旋使其長孫文田赴津習織染爲異日振興工業之預備宣統二年我成義興工場之組織卽由錦堂提倡而成卒年七十一子體乾宣統己酉拔貢

## 武如金

武如金字其相南區楊家莊人少入邑庠性磊落好排解鄉鄰有口舌爭者得金片言輒立解善種牛痘四方携兒來種者無論識與不識立即施種不索值清光緒二十八年六月景逆廷竄入鄰境有陳邦彥者依附景逆先聚衆於魏邑胡貫寺於初九日向我成甯擾沿途白范瞳司家瞳賈家莊等村均被劫掠午刻麇集於栢寺營太山廟時值亢旱饑民依附者逾衆大亂即在崇朝金方訓蒙於西岳固村聞變旋里路經栢寺營村外見羣情洶洶大驚異趕即曉以大義惕以利害衆豁然省悟如鳥獸散令其將邦彥擒捕送縣方就救平至民國元年因伏



莽徧野聯合東南四十三村成立民團手爲編制擬訂簡章并請領槍械盜賊聞風遠遁東南半壁得慶安塔卒年七十有四

採訪冊

苗某

邑南區宋村人苗某不詳其名字農家子家道貧寒饗餐不給嘗傭工於李家疇于姓之門爲其主人任牽賈負販之責其主人以其樸實戇直認爲財星授以重金命其獨身單鞭逐什一於魯豫之鄉某年東涉黃河至魯地叛匪四起道途梗塞音信隔絕其主人又嘆爲耗星意其或身罹鋒鏑委身溝壑或捲財肥已作客他鄉不意數載後車聲鱗鱗苗某復歸且利獲倍蓰

絲毫不染完璧歸趙主人德之噫若苗某者殆所謂忠誠樸實  
不負其主之義人歟

採訪冊

### 張維東

張維東字紫來成安人幼聰穎好讀書與弟維祺皆受庭訓家  
貧無衣食資常以鹽四五粒置白水中飲以代粥弟兄相視宴  
如也年十七以案元入邑庠旋食廩祿維祺亦遊庠補增廣生  
遂以講道論文教授生徒爲業列門墻者嘗數十人名士王慶  
潮遂迺疆皆其弟子也同治元年貢入城均以候選訓導年七  
十三卒所著有紫來文集課餘雜詠藏于家子庭蘭性仁慈雖  
家貧不給而慷慨好施予親族中有貧乏者常補助之家養使

女玉藍年及笄有世家納妾購之三百緡庭蘭不與女父林縣  
劉魁元來訪女使之相認不索分文使女從父歸孫永和永年

永清

採訪冊

### 李慎行

李慎行字盈遣賈家莊人事母至孝母臥病醫藥無靈常割臂  
寸許暗禱於關帝神前願減己算以益母壽後母尋愈聞其事  
而泣曰子乃忘其身以活我耶而尤慷慨好施里中有貧乏者  
皆周濟之一時賴其力全者甚衆

採訪冊

### 李向陽

李向陽字葵智世居城西北郎堡少聰穎讀書明大義博涉羣

書尤喜讀歷代史鑑性沈毅端嚴而接物謙抑故居家涉世均著德望弱冠應童子試以冠軍游邑庠又明年食餼清光緒戊戌歲貢然數奇不遇遂設帳教授生徒課業甚嚴因材施教口講指畫誨之不倦講經悉遵訓詁而爲文務求根柢一時士林爲之語曰欲學經師葵翁其深於經學可知矣向陽雖不以文名而每一稿出土林爭傳誦之於經傳而外對於諸子百家無所不窺且各有評語尤深於考據之學晚年遠方來學者益衆向陽教之咸曉然於敦品勵行故一望而知爲向陽之弟子焉性純孝於內則事親之禮無不踵而行之妻史氏有賢德事舅姑二十餘年未嘗有倦容庶母陳氏晚年患痢病一夕六

七起時其將起則進器承之少間又如之聽於無聲不失分寸或沾汗襦袴急爲浣濯凡十載未嘗一日安枕也嘗誡子孫曰吾才疏學淺不能博誥封以光泉壤甚愧見先人於地下又誠之以詩曰童年一刻值千金絳帳誰知惜寸陰自古誤人人自誤書香斷絕可寒心先生於民國十五年正月患病自知不起訓子孫曰余平生好學恨無所成凡吾所註書與制藝及手抄本三十餘種善爲珍藏雖不能藏之名山亦欲傳之子孫汝輩善體吾心以讀書求學爲念俾通材宿儒接跡吾門吾乃瞑目九泉矣言訖遂卒面目如生享壽七十三歲卒之日鄉隣聞之無不痛悼云爾

採訪冊

李祥雲

李祥雲字瑞徵李重村人性慷慨樂施與嘗言於人曰豹死留皮人死留名吾家產豐盈深以守財虜爲恥清季髮捻變亂鄉民時有恐怖之心祥雲倡納巨資修築寨堡嗣又經山東張錫珠之焚殺縣境四鄉逃避寨內祥雲設立粥廠救濟饑人有無知者霸守井眼漁利汲水之戶祥雲聞之大爲斥責亂定後有臨漳多村恭頌以德溢隣封匾額子誠字易民輕財好義亦卓有父風

採訪冊

張恂

張恂字嚴翼成安路固村人優廩生國清子也幼承庭訓年十

七補博士弟子員兩試秋闈蒙薦未售適祖文炳逝世卽輟舉  
子業助父理家政旋設館授徒門下士掇青紫者以十數恂持  
身以正治家以嚴於鄉鄰則謙遜和藹故鄉鄰向化數十年無  
鼠牙雀角之爭清光緒十四年由增貢報捐以訓導選用十八  
年委充壬辰科會試場差旋以監修文廟功首先拔署一次委  
署邢臺縣教諭在任立文社課生童循循善誘多士敬而愛之  
以丁母憂歸卒年七十一子殿臣邑庠生

遜宗稱

遜宗稱字又之號初直成安城內人賦性忠厚周旋門內時率  
天真幼嗜讀經史以外如諸子百家無不寓目爲文艷摘屈宋

香薰班馬一藝脫稿幾於紙貴洛陽童年補博士弟子員旋食  
餼道光乙酉舉於鄉當未揭曉前見其文者卽以榜花許之文  
章有定價觀於此而益信生平飭躬勵品一言一行無不中禮  
時人目爲純孺子篆國子監太學生採訪冊

劉灝附鳳章

劉灝字慕梁早失怙恃家業託季叔其琛料理能矢志向學卒  
承先業入庠食餼後尤鑽研經術其解經也常借指當代時事  
使學者易於領悟以此從學益衆清光緒乙酉前後有滿城桃  
李盡在公門之概面貌高古性沈靜與人交不尙浮言俗禮良  
朋至相視而笑引入伴書對坐往往半晌無一言其機一觸則



又引經據典雄辯高談四座皆爲懾服中庚子辛丑併科副榜  
就州判職卒北洋法政專門業高省長景祺慕其品學甚加倚  
重調委爲河東鹽運使署科長旋歸爲本縣教育局長及高小  
學校校長年五十八卒所著有桐蔭軒文集藏於家子三鳳儀  
鳳章鳳桐

按慕梁先生和授業師也和家素貧先生不責束脩且時助  
以書筆之費先生晚年習岐黃深脈理善調劑方藥公暇之  
餘施醫十數年遠近賴以全活者無算先生之明德可謂遠  
矣

鳳章字印若幼謹飭爲學靈敏而篤實入庠後卒保定工業專

門業民國六年充山西第二區徵收局文牘旋調入六政研究所畢業後委充大寧縣主計員到差凡財政方面賬簿文稿及條摺等件無不躬親辦理對於國家地方及司法等欸劃分釐然併清出升科糧銀二百餘兩以功獎給三等桐葉章升署解縣主計員旋又調升曲沃縣主計員其勤奮謹秘一如在大寧時惟縣愈大事愈繁一人之精力有限竟於十三年冬因勞失血卒於差次時年四十子振琳

### 趙宗閻

趙宗閻字和齋城內東街人幼孤貧恒率日不得一食惟恃其母勤女紅就學未嘗輟不幸母又卒居喪哀毀幾不欲生人稱

其孝因棄學改業戶科書辦然克勤厥職處事接物則忠誠儉樸嘗爲邑令戚朝卿所嘉許戚有言子不幸而入是途使子能修士業定能上達後戚爲其表請太學生獎勵之以成其美有鄉人某甲常受其隣人某乙所欺欲將某乙繫於囹圄於是商之宗閭央其與有司謀言事成願以重金作運動費趙大怨面罵某甲曰汝欲陷余不義也余雖貧豈能作負心事其人大慚而去蓋其生平多作義舉嘗爲人排難解紛如此晚年得痿疾足不步履者數年鄰里有爭持及疑難不決者尙就其宅以求一評屈直無不欣悅而罷年六十卒

採訪冊

### 張琴書

張琴書字樂天幼穎悟早入泮旋食廩祿貢於成均弱冠時著戒淫戒賭等歌詞一時膾炙人口被感化者甚衆事繼母以孝聞待異母弟甚加友愛遠近稱之無間言生平輕財重義樂善好施中年操家務將幼時所積資產盡數出而助家家業賴以稍振民國初年以事駐永邑出遊見丁某貧給洋數元丁識之托人說項以女相售琴書初不允後經屢說遂出洋六十元購爲使女逾年其父母來看女見女有戀戀不舍之意琴書遂不收贖欸慨然令女歸女父母甚感時來叩謝復駐馬頭鎮有寒士宋式儒得瘋癱病幾死琴書往問知其狀憫之慨然給洋五十元爲養生葬死之費宋二子均感激年來問候不絕其義舉

類多如是至設教授學講演擅長辨理精確學者領悟而舞蹈之輒有喜而不寐者且平生言行不同流俗每談時務議論風生獨持大體時人多號其客室爲議會晚近以來改革風氣開化事業鄉邑中受其領導者莫可勝數十九年卒所著有醒世眞言行於世子延芳延齡延緒採訪冊

### 董國鈞

董國鈞字和中邑第四區小郭莊村人性剛正抗直任俠好義幼年失怙事母能孝務博歡心清咸豐年間山左宋景詩倡亂過縣境國鈞舉村避難城堡賊去國均返里一片瓦礫滿目淒涼乃喟然嘆曰毛錐子安用哉乃棄儒講武弓馬嫻熟未幾列

入武庠嗣因赴北圍試未售遂薄功名而不爲四方拜門墻登  
顯科者幾不可樓指數如大郭莊武舉劉上哲胞弟國標堂弟  
國佐長子瑛同一案俱列入武庠清光緒二十六年歲大稔盜  
賊蜂起國鈞奉命倡辦團練保障一方又性友愛與胞弟國標  
終身無間言一堂聚處和樂且耽而慷慨好施輕財重義凡鄉  
隣中貧困婚葬苟一言告急千金不吝鄉人士至今猶嘖嘖稱  
道焉

採訪冊

### 康書田

康書田字代耕沙窩村人天性溫良和易近人少讀書粗通句  
讀不幸早年失怙恃家計蕭條因廢學業農焉嗣書田勤儉持

身家道豐裕遂輕財好義濟急恤貧救人無算里閭德之素遇鄉人有爭訟事必出頭排解雖舌弊唇焦傾囊捨財無吝色鄉人謂其有魯仲連之風焉子應時字際昌邑庠生孫金銘金城金樑惟金城曾充國民革命軍第二集團營長之職云爾

耿文光

文光字顯謨清同治元年東匪犯境有該村八人持械立村南匪至迫令繳械文光等不聽卽時兩方格鬥以衆寡不敵村人殞命者七文光身受七槍猶力戰後村人大衆來援並誤傳官兵追至匪乃北竄文光至家衣被血黏久不能解醫治兩月始愈又光緒二十八年景廷賓抗欸逃亡道路以傳有謂其潛藏

北漳堡者直督袁世凱令統領馬龍標往勘至北漳堡村外暫  
駐行旌文光時充村正出見統領乞隊伍停村外惟邀統領到  
宅小飲盃茗統領極其和藹除盃茗以外一概不勞供給臨行  
但取村正手書一紙言明該村並無匿匪以便回省復命事畢  
一村感紉曾祖雲字從龍祖磐字安定父維新字振基另有傳  
娶郭氏繼娶王氏子一孫四曾孫四俱見維新傳中故不著

### 霍汝堂

霍汝堂字壽岩北漳堡人幼聰穎年十三背誦五經及四子書  
初爲文卽枚速馬工兼擅其長與吳麟經結文社至課期仿擊  
鉢催詩故事兩人一日各成文十五首且工整因通蘭譜後又



與劉環洲續訂盟謂之三角同盟光緒乙酉科領鄉薦恬退不仕性醇謹一生不入公門教授生徒多在邯鄲磁縣大名等處前後捷南宮登賢書食餼遊庠者不下五十餘人所著有桐雨軒文集藏於家

採訪冊

### 池甫明

池甫明字霽園成安城內人守備公及修曾孫也幼時讀書過目輒成誦入庠食餼後以家貧教讀爲生光緒丁酉舉於鄉主講本邑聯暉書院性至孝繼母年老失明甫明於督課生童之餘時進甘旨併作斑衣嘻戲以悅其心及卒盡哀盡禮遠近敬服年六十一卒子同恩廣恩早卒孫鎮崙

採訪冊

## 耿長江

耿長江字德盛道號明恩

因傳佛道故有是號

成安北魚口人幼聰慧母勉

之曰吾家世代書香家所藏書不可不讀十六歲失怙爲家務累半耕半讀暇習岐黃期以活人濟世久之醫遂精併得異人傳專治疔毒收奇效一日南彭留村人染疔甚劇長江至疹視訖曰晚一刻休矣爲之施刀圭立愈晚年醫道大興活人無算且施藥不論貧富延請必至後車馬盈門不能外出常著四子廷梧代爲疹治宣統二年勸各村栽樹卽在本材村東各沙地栽種除李杏梨桃外柳榆尤多民國九年歲饑村人採樹葉伐樹枝資以生活者以萬數而栽果樹者皆由赤貧以至小康十

五年八月以病卒年八十四子六廷梅廷椿廷槐廷梧廷枝廷桂而廷槐北洋法政專門畢業爲天津律師公會會長孫三運樞法商學院法律專科畢業運隆第一中校高級畢業運豐甲種商業學校畢業女孫玉華河北第一女子師範學校畢業

### 常省吾

常省吾字希曾成安中郎堡人性嚴正書非秦漢以上不讀爲文獨喜大家遊庠食餼後從永年武孝廉泚亭學得其剛直忠純之氣於文章經濟之間武孝廉甚器重之與胡方岳景桂盟方岳遊學京保時家中鹽米柴炭省吾供給之十數年不缺方岳常語人曰希曾吾之鮑子也德配李孺人早卒乃終身不再

娶其居家也謙謙循循和藹之中獨寓中正之節其於子弟也不惡而嚴日間起居動作皆有準則不失尺寸是以鄉人皆愛而敬之清光緒二十年貢入成均以候選訓導卒子三樹森樹

梅樹聲

採訪冊

和按希曾先生家素豐善賙給寒畯和少時貧甚從師劉慕梁館先生家一切書籍飲食煤炭之費皆不令出資補送又嘗見先生親書漢書石奮傳以教子弟及同學肄業者先生之仁厚純謹於此可見一斑矣

蔡金斗

城東艾東村有蔡金斗者性耿直尚義氣事親以孝聞幼讀詩

書長務農父字澤久精岐黃母劉氏勤紡織家不中資尙可溫飽清宣統三年母病金斗服侍湯藥歷二十晝夜無倦容弟若妻有愿代者皆婉言却之既而病劇父診斷曰病入膏盲醫藥無靈矣金斗至是已禁食三日聞父言大慟急趨已室仰天祝曰母我一家所依也母死一家星散矣與其母死何如我亡祝畢持刀向左臂割肉一片可二三兩血漬淋漓見者駭然家人急敷以藥用布裹之囑作藥引以進母翌日母病果瘥未幾全愈鄉鄰皆信其孝誠格天也知事高景祺聞之賜以至誠感神匾額直督張錫鑾復以孝義可風旌其門焉迄今二十餘年鄉

民猶稱道弗置云

採訪冊

郭完固

郭完固字壯觀成安北鄉義武庠生性慷慨好施予雖家僅中資不顧也村中舊有義學一處館田數畝每每不付開支完固仗義輸財多有捐助且爲人排難解紛正直敢言至今有道之者子長安

採訪冊

長安字久遠性至孝事父母善博親歡親之所欲力爲致之年四十依依膝下若孺子然以故鄉人歌之曰九月裏菊花鮮孝敬父母郭長安時刻不離父母前孝之出於眞誠概可見矣子壽春武生孫恩魁武生曾孫正心玄孫朝卿

採訪冊

恩魁字慶廷成安北鄉義武生讀未成改習武遂入武庠頗著

聲望清光緒二十六年荒亂本縣成立守望團五村公舉爲團長大名道王來成驗操慶團長指揮有方甚見稱許二十七年四月間縣署派隊官二人赴廣平會議至北鄉義村東沙內被土匪圍困土匪約二十餘名慶團長聞警率隊往救身先團勇奮力擊賊圍乃解後由縣署傳諭嘉獎而慶團長義勇遂遐邇皆知矣

採訪冊

### 方書香

方書香成安中區金山村人素業農民國二十年八月十號拂曉有臨漳土匪七八十人持械入村村人設法抵禦自朝戰至日傍午以無援力竭被匪打死男子大小十三口打傷婦女小

兒十二人擄去人票十七八人性畜二十餘頭焚毀房屋三十餘間時書香被匪捉獲匪令搬負黍楷赴鄰人樓下發火書香不肯以理說匪匪益橫書香不屈遂被匪連擊數彈死之嗚呼當土匪在村焚殺之時負保民之責及擁有警團者皆趑趄畏縮環觀而不敢進鄰近村民又倉皇逃竄不能結合羣衆伏據要害而爲之援獨書香被虜村中尙能崛起強以死若書香者亦可謂舍生取義者矣

按匪徒在金山村焚殺劫掠之後有已被殺侯慶昌之女卽已被殺李鳳林之妻李侯氏除將其所生三歲男兒當場擄死外並將該氏及其繼母亦同擄至匪巢

聞匪巢在臨漳縣界內之羊羔村距金山約十里距



成安城約二十里未知確否 匪欲強逼成姦該氏不肯匪卽痛加威嚇且創坑

聲言活埋該氏並將在金山割去該氏父頭以示氏氏卽大罵求死從容走入坑內喊匪速埋匪乃持刀剖氏腹扒心抽腸將氏父頭置氏腹內用土掩蓋氏罵不絕口而死自古死節之烈未有烈於此氏者但此案未破消息得自傳聞姑記之以待徵實

### 宋慶安

宋慶安南渚村人幼年失怙尙拳勇然深自韜晦常畏人知以故無稱之者母翟氏清白持身劬勞教子家徒四壁惟以紡織自養清光緒十一年七月間氏染沈疴幾不起求醫問卜百藥

無靈慶安泣禱神前自言如蒙神佑爲母增算情願自剝體肉  
敬答神麻未幾母病果愈後值新年初一日殷殷然割股酬神  
此雖愚孝然一念真誠實有大異常人者所以鄉人以庸德奇  
行匾額頌之迄今家業興隆子孫昌盛天道誠屬有知哉

### 三烈士

韓體乾字健臣姚堡人清拔貢秉性剛直自幼志向高超與平  
常幼童異稍長入家庭私塾讀書受父兄教文章英豪應童試  
爲全縣冠平素富革命思想鄙視舉子業遂于清光緒三十二  
年考入天津北洋法政學校以期得新學知識適同盟會諸同  
志在津保一帶秘密工作經王楨同志介紹入同盟會後在津

卽秘密工作于民國元年被選爲直隸省議會議員在議會宣傳革命復在本縣設立國民黨支部充任部長聯絡各界同志入黨並發給黨證全縣共計入黨人數約五六百人此時革命空氣大爲澎漲又在本村創立義興工場注重民生主義俾作工人員亦明瞭革命民國六七年間前直隸省長曹銳專政仇視國民黨密令各縣知事設法坑陷黨員本縣知事林蓬春貪婪性成時欲見好長官得此密令遂從事捕拿著名黨員韓同志乘隙逃往湖南省投効軍隊宣傳革命至民國九年七月間因事旋里林知事蓬春密飭警拿獲加以擾害治安罪名解至天津高等審判廳經數次審訊毫無實據遂用毒藥毒斃獄內

李鶴雲字冲霄楊寺村人清廩膳生性沉靜有毅力自幼喜讀書稍長受父兄教議論超羣常閱歷代史學批評政治得失應府院試名列前茅但平素鄙視功名遂于光緒二十九年投考保定師範學校以期研究新學改革政治適值同盟會同志在保定秘密作工經張紀五同志介紹得入同盟會在師範學校肄業時卽秘密宣傳革命畢業後充任清豐縣高等小學教員于講課時間參加革命主義俾學生增加革命思想復充本縣高等小學校長在校內設立秘密工作機關于民國元年充任本縣國民黨支部宣傳股幹事從事鼓吹革命忽聞曹銳通令逮捕遂逃往北平後因韓健臣李香亭兩同志被解天津加以

擾害治安罪名毒斃審判廳獄內于是念同志等從事革命尙未有若何成績竟相繼遇害大爲不平遂潛赴津擬炸斃曹銳與韓李兩同志報仇不意曹銳防衛過嚴無隙可乘因之氣憤填胸肝氣大發竟死于天津客棧

李蘭字香亭城內人天性勇猛自幼不避危險常與幼童等比較武力稍長入學讀書不畏權貴抱改革滿清政治思想於清光緒三十二年攷入保定警務學校以期增加新政知識適同盟會同志等在保定秘密工作得此機會大悅遂托張紀五同志介紹入同盟會在警務學校肄業時卽秘密工作畢業後充任本縣警察教練員乘機對於警士宣傳革命俾辦警人員明

瞭滿清政治之腐敗復在本縣城內設立恒豐書局作爲密秘機關藉以聯絡各小學教員學生輸入思想於民國元年在本縣國民黨支部充任交際股幹事二三年間全縣人士革命思想大爲增高迨至前直省長曹銳專政時對於國民黨主義極力反對密令各縣知事設法嚴懲黨員本縣知事林蓬春素知伊爲國民黨幹員將伊誘至縣署聲稱奉令嚴拿遂釘鐐入獄至民國九年將韓同志健臣解天津時亦將伊解至天津審判廳因訊無憑證用毒藥毒斃獄中自此以後本縣革命諸同志皆相率赴省工作

### 岳杏林

岳杏林大霍村人中郎堡常希曾先生之僱傭也年十七卽入常宅性誠實作事竭盡心力以此得主人信任咸豐末山東流賊竄擾縣境地方不靖希曾同弟箴吾令杏林夜置銅錢千串於家屋坑內囑勿洩除兩主人與杏林外任何人不知也歷數十年兩主人相繼歿杏林亦衰老不能勝筋力事少主人以杏林衰弱難任也親信亦稍稍衰然終以老僕不得不從優看待適杏林久病不事工作又見少主人有不悅意飲食言語皆不似老主人在世時於是請少主人給假回家養病杏林向無妻室歸依族嫂處臥養而侄又出外從軍數年未歸病遂日加沈重臨危時使鄰人密告少主人言汝杏林病將不起有密話請

主人速去面告少主人以爲必計身後衣棺等事遂令隣人先去說我得暇卽到越二日杏林病益急而少主人未至自忖曰此事若不言明死無面目見老主人於地下且此時銅元盛興制錢久埋恐成廢物萬不得已又請隣人再去密告少主人言汝杏林言某屋坑內於某年月日曾同老主人置銅錢千串於其中至今家無知者今制錢將廢少主人應取出設法處置杏林是不能再候與主人面告矣少主人急隨隣人至霍村而杏林死已半日少主人遂歸將錢取出而杏林衣棺之費亦資給焉

採訪冊

按和少時從師館希曾先生家時杏林年已四五十直誠古



樸世所希有希曾先生及弟所至處杏林皆爲御車一切衣  
食物之購入花糧雜品之賣出所用銀錢無不經杏林之手  
而杏林亦忠赤性成毫無私曲意和宦晉未歸杏林死已七  
八年死時對於少主人又如此周至死亦可以告無愧焉烏  
呼若杏林者可謂義僕矣

